

# Club da tennis Trun

Protocol dalla radunonza generala

dils 10 da mars 2017 allas 20.00 el Tödi



## Gliesta da tractandas

1. Beinvegni ed appel
2. Elecziun da dus dumbravuschs
3. Protocol dalla radunonza generala dils 11 da mars 2016 (**publicaus sin [www.ct-trun.ch](http://www.ct-trun.ch)**)
4. Rapports annuals
  - a) president
  - b) meinagiug e meinaturnier
  - d) cau da juniors
5. Rendaquen
  - a) quen annual
  - b) rapport dallas revisuras
6. Elecziuns
  - a) cau da juniors
  - b) meinagiug
  - c) president
  - d) revisura da quen
7. Nominaziun da commembers d'honor
8. Mutaziuns
9. Fixaziuns dallas contribuziuns
  - a) annualas
  - b) affitaziuns dils plazs
10. Damondas da pagar anavos quotas da fatschenta
11. Program / termins 2016
  - a) termins
  - b) revisiun dallas statutas
12. Varia

Adatg: Tgi che drova buca pli la licenza uonn, duei far aschi bien ed annunziar quei immediat agl Ursin Lechmann (076 418 14 15) Autr'uisa stuein nus tarmetter il quen per la licenza.

Fevrer 2016

per la suprastonza  
Il president Arthur Cantieni

## **1. Beinvegni ed appel**

Il beinvegni ei succedius sco introducziun alla radunonza. Per far appel han ins schau cursar ina gliesta da presenza. La gliesta da tractandas vegn approbada unanimamein cun aschuntar sut punct 6 l'elecziun dall'actuara e revisura da quen. Ultra da quei giavischa Erich da ver endamen sut 11b la revisiun dallas statutas.

Avon ch'entscheiver la radunonza generala seregorda il president dad Adolf Riedi, in dils commembers fundaturs dils Club da tennis da Trun e secund president dil club, digl onn 1981 agl onn 1983.

Adolf Riedi ei morts ils 8 da schaner 2017 ella casa da tgira s. Martin a Trun. Ad el descha in grond engraziament. Il president supplichescha ils presents da sesalzar e seregurdar dil defunct durant in minuta tgeua.

## **2. Elecziun dils dumbravuschs**

Sco dumbravuschs vegnan Erna Nay e Karin Demont elegidas.

## **3. Protocol dalla radunonza generala dils 11 da mars 2016**

Il protocol dalla davosa radunonza generala ei vegnius publicaus sin nossa pagina d'internet. Aschia ha mintgin giu la pusseviltad da leger quel. Demai ch'ei dat neginas damondas e neginas objecziuns per amplificaziuns vegn il protocol approbaus unanimamein. Il president engrazia all'actuara.

## **4. Rapports annuals**

### a) president

La suprastonza ei seradunada quater ga igl onn vargau. Da niev vein nus decidui ch'igl onn dall'uniun dueigi corrispunder al calender digl onn, aschia sco previu ellas statutas. Quei vul dir che nus vein ser-rau la bilanza fin december e buca sco els davos onns pér suenter la sera da lotto. 2016 vein nus pia neginas entradas ord il gudogn dil lotto (tschei onn ei quei stau in gudogn da 16'000). Ord quei motiv serrein nus il quen cun ina sperdita da rodund 5000 francs. Igl onn proxim vegn la suprastonza puspei a saver presentar in quen pli equilibraus. Vus vegnis ad udir pli bia tier quella tematica sut la tractanda 5 rendaquen.

Grazia agl agid dils commembers ei la preparaziun dils plazs all'entschatta digl avrel puspei gartegiada stupent. Mario Rothmund ha dau quitaun ina davosa sesiun dils plazs e procurau ch'els ein stai en buna cundiziun. Il sistem da schuar il plaz 1 ha fatg empau fastedis a nus. Aschia vein nus dau l'incarica alla firma Joseph da reveder il sprizzader. Quei ha caschunau cuosts empau pli aults pil manteniment dils plazs.

Erna Nay ha tenu schuber e bi la casa dil club sco usitau e dau breigia ch'il contuorn vesi ora bein cun decorar las spundas cun bialas flurs.

Las sera dil club ei buca stada visitada aschi bein sco la stad vargada. Ei ha denton dau bialas seras da buna cumpignia ed il settember – sco finiziun – ha Silvio Albin cuschinu in magnific risotto per tuts ed igl ei seresultau ina sera dil club en legra cuminonza.

Cun Karin Demont, Riccarda Tuor, Erich Decurtins ed Arthur Cantieni ha il ct Trun contonschiu ils miezs finals dil Cup dil club Grischun ch'ei vegnius distribuius l'emprema gada uonn. Cordiala gratulaziun.

Il project "casa dil club aviarta" cun la pussevkladad da survir sesez vein nus dau si. Igl interess era memia pigns. Forsa che la nova suprastonza selai incantar danovamein dall'idea.

Il punt culminont digl onn dall'uniun ei stau il giubileum dil ct Trun. Egl archiv dil club hai jeu legiu cun grond interess davart la historia dall'entschatta ed il svilup dil club. Cun quella caschun vi jeu engraziar da cor als fundaturs – entgins ein aunc oz commembers activs dil club – per lur curascha e lur engaschi.

Vus veis prestau in ton e dau damogn a biars obstachels. Senza vus mass ei oz buc aschi bein cul club. L'aura ha buca manegiau bein cun nus il di da fiasta aschia che nus vein stuiu stuschar il турниr amical dalla sonda sin la dumengia. Ei ha legrau mei zun fetg che presidents e suprastonts dils onns vargai dil club ch'eran gia daditg buca pli stai presents sigl intschess dils stabiliments da tennis han anflau lur via ella casa dil club. Gest era per mei sco persuna tratga neutier eis ei stau fetg enrihond d'emprender d'enconuscher tut quellas persunalitads. Medemamein ha ei fatg plascher che tut ils clubs da tennis dalla Surselva, da Sedrun, Mustér, Tavanasa, Breil e Glion ein suandai l'invitaziun. Cun Marianne Tamigani ha schizun l'uniun da tennis dil Grischun gratulau al ct Trun sin siu giubileum.

Sco finiziun less jeu engraziar a tuts che han contribuì lur part ch' igl onn dil club 2016 ei gartegiaus: Erna Nay e Mario Rothmund hai jeu gia menziunau. In ulteriur engraziament descha allas revisuras dil quen, a nos numerus sponsurs ed als trenaders dils juniors. Engraziel era als teams dad interclub che han procurau per spisa e bubronda durant ils turniers e la fiasta da giubileum.

Secapescha engraziel jeu era a mes collegas da suprastonza, Annette Decurtins, Tamara Albin, Carla Nay ed Ursin Lechmann.

#### b) meinagiug

Il president surdat il plaid ad Ursin Lechmann.

Entschiet han las activitads sportivas per la sesiun 2016, sco usitau, sco gia tradiziun, cul camp el Tes-sin. Uonn danovamein a Locarno. Nus vein puspei giu cletg cull'aura ed ei ei propi stau ina biala fin d'jamna. Vein saviu guder il sulegl, il bien da magliar, la buna cumpignia e vein filau vid nossa tecnica. Stau super sco adina... e gleiti mein nus gie schon puspei.

Denter auter grazia a quei camp essan nus stai preparai bein silla sesiun dad interclub, che ha entschiet sco usitau entschatta matg. Igl onn 2016 ein puspei 4 equipas separticipadas al campiunadi d'interclub.

- L'equipa da damas dalla 1. ligia ha dau ina super sesiun. Ellas ein vegnidas empremas dalla grupp. Aschia han ei puspei saviu dar promoziun. Leu ha ei lu buca tunschiu encunter l'equipa da Belvoir Turitg. Tuttina san ellas mirar anavos sin ina buna sesiun, ellas ein propi setabladas bein ell'emprema ligia.
- Era nossas damas giuvnas senioras ella 3. ligia han mussau ina super sesiun. Ellas han gudi-gnau tut ils quater giugs a moda suverana, in giug schizun cun 6:0, ed ein aschia vegnidas meritadamein empremas da lur grupp. Gratuleschel! Quei munta la promoziun en secunda ligia. Quella han ellas era priu encunter e dattan l'auter onn en secunda ligia. Plinavon dat ei ina nova equipa, ina dalla 3. ligia. Aschia che nus vein lu per l'emprema ga 5 equipas activas che dattan interclub.

- Ils umens seniors ein puspei semussai en grondiusa fuorma. Suenther ch'els han giu fatg il pass en secunda ligia, han els era giu leu grond success. Ella grupp ein els vegni seconds, han pia saviu dar ils giugs da promoziun. E leu han els gudignau omisdus cun 5:2, propi ina super prestaziun da nos rutiniers! Els vessan saviu far il pass ell'emprema ligia. Els han denton desistiu. Quei ch'ei segir capeivel.
- Ils umens activs han puspei saviu dar ella secunda ligia la sesiun vargada. Cul rinforz dils novs giugadurs, denter auter dus da Mustér, respectivamein Medel, ha ei dau ina pulita sesiun. La finamira da restar ella 2. ligia ei stada cuntunschida cul secund rang. El giug da promoziun ha ei dau ina schlepra dad 8:1 dall'equipa dall'Engiadina. Sco spitgau va ei pia vinavon en secunda ligia.

Ursin engrazia grondamein a tut ils capitans per la buna lavur fatga en favur da lur equipa ed era al club. Era allas giugaduras ed als giugadurs dallas equipas per lur engaschi a caschun dils turniers ed autras occurenzas drezza el in engraziament. Las equipas d'interclub ein fetg impurtontas pil club.

Suenther il temps dad interclub eis ei iu vinavon cun ils turniers da stad. Entschatta fenadur ha giu liug il Cup Crestas e la fin uost il Cup Punteglias. Ils dus onns vargai ei il diember da participonts sesminuius. Cunzun duront il Punteglias ha ei dau ina biala fin d'jamna da turnier. Damai ch'igl ei vegniu dau en gruppas, ein biars giugs seresultai. Igl ei stau in program da giug pulpius naven da venderdis sera entochen dumengia suentermiezdi. Quei vala ei da mantener per aschia ver turniers attractivs cheu tier nus. Al turnier dil club ein 12 damas e 9 umens separticipai.

La participaziun dallas damas ei danovamein stada buna. Tier ils umens eis ei, sco gia igl onn passau, stau magher. Dils seniors han puspei relativamein biars dau, ils giuvens ein denton stai presents magramein cun dus giugadurs. Quei ei propi donn.

Il punct culminont da quest onn ei la fiasta da giubileum cumbinada cul turnier dil club stada. Damai che Ursin ei staus en Brasilia duront quei temps sa el buca dir dapli da quell'occurrenza.

Era uonn ei il "dar gliesta da rangaziun" vegniu organisau. Curdau en egl ei, ch'igl ei surtut vegniu dau dubel. Igl ei segir stau ina bun'idea da nos commembers da far in tableau dubel.

Rangaziun singul:	1. Arthur Cantieni
	2. Gion Petschen
	3. Erich Decurtins
Rangaziun dubel:	1. Manuela / Arthur
	2. Karin / Erich
	3. Gaby / Luis

Alla fin engrazia Ursin als collegas da suprastonza, al chef dil plaz ed alla cautegia per la buna collaboraziun, a tuttas giugaduras ed a tuts giugadus che prendan part als turniers da nossa regiun sco era a tut ils auters che segidan sin ina moda u l'otra cul club da tennis Trun.

Cunquei va la lavur ella suprastonza a fin per Ursin suenter duas periodas d'uffezi. El vegn a guder siu temps cun sia famiglia. El accentuescha ch'ei seigi stau interessants onns e bi da far quella lavur. Cun sia professiun eis ei buca stau sempel da s'organisar e d'anflar temps. Mo las uras sin e sper il plaz ni las radunonzas culs collegas dalla suprastonza ein stadas bialas. El engrazia aunc ina gada a tuts. Ussa vegn el a passentar il temps plitost cun ir a spass cun la poppa e cun far schetg. Mo mintgaton vegn el segir era vinavon a cuorer suenter ils bals mellens.

### c) cau da juniors

Il president surdat il plaid al cau da juniors, alla Carla Nay.

La sesiun da tennis 2016 ha entschiet cun l'organisaziun dils trenaments dils juniors e las junioras.

#### Trenament

Entschatta avrel ein ils taluns d'annunzia vegni reparti el consorzi da scola Trun/Sumvitg. Nus vein retschiert totalmein 37 annunzias, 10 kids e 27 juniors e junioras. Quei ei in'annunzia pli pauc ch'igl onn vargau.

Fin avrel han ils trenaments entschiet.

Ils kids ein vegni trenai da Ricarda Tuor-Albin en duas gruppas la mesjamna suentermiezdi. Suenter siat trenaments han ils affons dau in turnier da finiziun. Els han saviu mussar lur progress e han giu grond plascher dils numerus aspectauturs e dils premis ch'els han retschiert. Uonn ha ei dau in premi special, in t-shirt cun il logo dil club a caschun dil giubileum da 40 onns Club da tennis Trun.

Avon cuort ha Ricarda stuiu dar giu siu post da trenadra, quei pervia dalla lavur. Nus essan alla tscherca d'ina persuna che surpren quei impurtont post.

Ils juniors e las junioras dad 11-18 onns ein vegni trenai dad Urs Pfister, Simon Decurtins, Erich Decurtins, Carmen Bearth-Albin e da mei. Cun 27 annunzias havein nus puspei saviu far 5 gruppas da trenament. Igl Urs ed igl Erich han trenau il gliendisdis, la Carmen ed jeu ils venderdis dalla primavera ed il Simon ils venderdis digl atun. Per terminar la sesiun da tennis havein nus organisau in turnier da finiziun fin settember. Bunamein tut ils affons han priu part. Ils affons han dau tennis e differents giugs. Per mintgin ha ei dau enzatgei da gudignar ed era per els ha ei aunc dau in t-shirt dil club. Da miezdi ei vegniu grillau e magliau pommes frites – engraziel fetg alla Beni dil Tschut pils pommes!

Engraziar less jeu era alla Ricarda, agl Urs, agl Erich, alla Carmen ed al Simon per lur super lavur e lur grond engaschi a favur da nos juniors. Senza vus fuss tut quei buca stau pusseivel.

#### Interclub da juniors/as

Uonn havein nus saviu annunziar 6 gruppas pigl interclub da juniors.

Duas gruppas da buobas han dau ella Liga A ella categoria U18

Quei ein inaga las schumellinas Tamara e Milena Derungs.

Ella secunda equipa han Tajana Pfister ed Anna Manetsch dau.

Ellas han giu finiu igl interclub suenter la runda da gruppa.

Era ils giuvens han uonn puspei dau interclub da juniors. Els han puspei dau ella Ligia B, la ligia d'entschevider nua che giugadurs da R7-R9 astgan giugar ch'ei all'entschatta da lur carriera da tennis.

Auter che tier la liga A ein ils giugs fini suenter las partidas da gruppa, ei dat pia buca las rundas da ko.

Duas equipas han dau ella categoria U18. Quei ein Ramon Orlik e Yannic Duff ed en l'autra equipa han Joel Cajacob, Leon Degonda e Fabio Carigiet dau.

Levin Cajacob ed Urs Eicher han dau ella categoria U15.

Niev han uonn era duas mattas dau interclub da juniors ella Ligia B U15. Quei ein la Paula Maissen e la Dania Petschen.

A tuts juniors ed a tuttas junioras che han fatg part agl interclub da juniors ina cordiala gratulaziun per las prestaziuns.

#### Cader regional

Era uonn ha il Nic Dermont menau atras il cader regional a Mustér, nua ch'el trenescha mintgamai la mesjamna giuvenils dalla regiun durant igl unviern. Uonn separticipeschan 2 giuvenils da nies club al

cader. Quels ein: Dania Petschen e Paula Maissen. Uonn han pli paucs priu part al cader cunquei ch'ei vava mo pli paucs plazs libers per giuvenlis da nies club.

Quels cuors vegnan susteni dil club cun 50.- fr. per giugadur/a.

#### Camp da tennis

Il tennis-camp Surselva vegn menaus atras duront la stad en 3 loghens ella regiun Surselva. Igl onn 2016 ei quei stau a Mustér, Trun e Glion. Giugadurs entscheviders ni pli avanzai ord l'entira regiun san separtizipar al camp. Miez fenadur ha il camp giu liug a Trun. Nus vein giu 9 annunzias. Ils affons ein vegni trenai da Roger Lang. Era uonn vegn il camp puspei ad haver liug cun Roger Lang, quei era ina ga a Trun.

#### Program per la proxima sesiun

Per la sesiun 2016 ein ils trenaments da juniors/as puspei previ sco tochen dacheu. Entginas gruppas vegnan era a separticipar agl interclub da juniors.

Per Urs e Carmen eis ei stau la davosa sesiun ch'els han trenau nos juniors. Suenter biars onns han els decidiu da terminar cun lur lavur da trenader. Niev vegn Nic Dermon e Karin Demont a surprender ina part dils trenaments. L'otra part vegn Simon Decurtins a far vinavon.

Tuttina essan nus alla tscherca da trenaders, cunzun per la mesjamna suentermiezdi. Igl ei fetg impurtont d'anflar persunas ch'ei promptas da trenar nos pigns e giuvenls ch'ei il futur dil club. Jeu selegrel da mintgin che s'annunzia tier mei sch'el ha interess da daventar trenader.

## **5. Rendaquen**

### a) quen annual

Nossa cassiera Tamara presenta il quen e la bilanza dalla sesiun 2016. Cun in total d'entradas da frs. 31583.70 ed in total d'expensas da frs. 37113.80 siara il quen annual cun ina sperdita da frs. 5530.10. La raschun per la sperdita ei la cunfinaziun dil quen ch'ei gia successida il december 2016 e buca sco tochen dacheu pér suenter il termin dil lotto la primavera dalla nova sesiun.

Il president engrazia alla cassiera per la fetg buna lavur prestada.

### b) rapport dallas revisuras

En num dils revisurs plaيدا Lea Alig. Ella sa comunicar ch'il quen ei vegnius menaus schuber e bein e che tuts mussaments necessaris ein avon maun. Ella engrazia a Tama Albin ed all'entira suprastonza per la buna lavur prestada. Essend ch'ei dat neginas objecziuns enviers il quen annual fa ella si la tscherna d'approbaziun. Il quen vegn approbaus unanimamein.

## **6. Elecziuns**

Il president pren puspei il plaid e declara che Tamara ei vegnida elegida igl onn vargau per dus onns sco cassiera e la Carla Nay per in'ulteriura perioda sco cau da juniors. Tamara ei aschia elegida automaticamein per in'ulteriu onn. Damai che Carla surpren il post dall'Annette Decurtins sco actuara fa Arthur la proposta dad eleger Carla per in onn – per restar el turnus dad 2 onns – cun in applaus sco nova actuara. Ils presents fan quei unanimamein.

#### a) cau da juniors

Sco niev cau da juniors vegn Simon Decurtins elegius. Simon ha gia bunas experientschas el menaschi da giugs entras si'occupaziun sco trenader dils juniors.

#### b) meinagiug

Sco niev meinagiug propona il president Silvio Albin. El sa buca s'imaginar enzatgi che fuss pli ideals per quei pensum: Silvio seigi cummunicativ, cooperativs, coordinativs, cumpetents, creativs, cumpatibels, orientaus al consens, corrects ed intelligents. Silvio Albin vegn elegius unanimamein.

#### c) president

Sco niev president propona Arthur Cantieni Erich Decurtins. Erich sengascha gia dapi onns pil club. El ha fungau gia en differents posts, seigi quei sco meinagiug, trenader dils juniors ni dils teams dad interclub. Duront la preparaziun dils plazs eis el bein in dils impurtonts acturs. Erich vegn elegius unanimamein.

Il president engrazia alla nova suprastonza per lur veglia da s'engaschar en favur dil club da tennis Trun e gratulescha ad els per lur elecziun.

#### d) revisura da quen

Lea Alig vegn eligida unanimamein.

### **7. Nominaziun da commembers d'honor**

A caschun dil giubileum da 40 onns ha Arthur Cantieni priu la peda da sfegliar atras differents documents egl archiv dil club da tennis da Trun. Aschia ha el fatg stem che differentas personas han gronds merets concernent noss'uniun.

Schegie ch'ei dess differentas personas che savessan vegni honoradas ein cunzun duas personas dadas en egl al president partent sco persona d'ordvart. Sin fundament dallas retschercas dad Arthur ha la suprastonza giu endamen davart quellas observaziun ed ei sedecidida da honorar duas personas ch'ei sefatgas meretas gia avon entgins onns per il club da tennis da Trun.

El temps dalla fundaziun ei quei stau **Serafin Rensch**, el ei staus president naven dils 1976 entochen ils 1981, ella phasa dalla costruziun dalla casa e dils plazs **Albert Demont** ch'ei medemamein staus ella funcziun dil president naven da 2003 entochen 2006. Omisdus han luvrau nundumbrevilas uras duront lur temps liber e cun la paga da Dieus per nossa uniun.

Arthur Cantieni supplichescha ils presents da dar scarica alla damonda per la nominaziun dils novs commembers da honor Serafin Rensch ed Albert Demont cun in applaus. Quei succeda unanimamein.

Serafin Rensch pren il plaid. Avon 29 onns eis el sortius dils club da tennis. Suentar ch'il plaz da tennis era baghegius a Trun ei seresultau in ulterior grond project ella region: la piazza da golf si Sedrun. Era leu seigi el denter auter s'engaschaus ella cumissiun da baghegiar ed el cussegl d'administraziun. Aschia ei la midada naven dil tennis tiel sport da golf sedada tier el. Il svilup dil club da tennis Trun els davos 40 onns ed il diember da commembers ei remarcabels. Sch'el patratgi con difficil ch'igl ei stau pli baul da s'engaschar pil sport da tennis e realisar il plaz da tennis constattescha el ch'il club seigi en buns mauns. Il club hagi fatg grond progress ed ei seigi remarcabel co ils commembers s'engaschien pil club. Medemamein seigi ei legreivel da veser ch'il club vegni da captivar la giuventetgna, cunzun era

grazia alla gronda breigia che vegni fatg per quella entras l'uniun. Aschia eis el da buna fei ch'ei reusseschi da mantener il club.

Albert Demont engrazia per la nominaziun e seregorda da certas vuschs criticas ed incaps duront la phasa da baghegiar. El accentuescha che la cumperegliaziun da Venanzi cun ina locomotiva vali mo a mesas. Ei drovi bein ina locomotiva che tili ils carrs, sin quels carrs stoppi ei denton esser glieud che segidien per saver reussir. Albert siara cun engraziar aunc inaga per la nominaziun e giavischa a tuts presents ina biala sera.

## **8. Mutaziuns**

Las suandontas personas han tschentau la damonda d'entrar en nies club:

Affons e juniors:       Tino Cadruvi  
                              Jana Lia Friberg  
                              Debora Galluzzo  
                              Mauro Galluzzo  
                              Alina Wolf

Las suandontas personas extreschan da nies club:

Carschi:                 Tanja Degonda  
                              Zita Mazzetta  
                              Raffael Palaia  
                              Adolf Riedi  
                              Andri Bearth  
                              Carlo Gautschi  
                              Kevin Giger  
                              Livio Janka  
                              Geraldine Pfister  
                              Yannik Pfister  
                              Patric Tuor  
                              Patric e Martina Schaniel

Affons ed juniors:     Larissa Albin  
                              Elena Candinas  
                              Selina Tomaschett

Ei seresulta aschia in total da 157 commembers, 127 da quels ein activs (36 da quels ein affons ed juniors).

Las numnadas personas vegnan pridadas si el club unanimamein.

## **9. Fixaziuns dallas contribuziuns**

### a) annualas

La contribuziun annuala resta sco dacheu.



#### b) affitaziun dils plazs

Era cheu dat ei neginas midads uonn.

### **10. Damondas da pagar anavos quotas da fatschenta**

Sco mint'onn vegn era uonn pagau anavos las quotas da fatschenta. Ils numms da Clau Rensch e Tresa Meinrad Demont-Nay vegnan tratgs ord la capiala. La cassiera vegn incaricada da liquidar quella causa.

### **11. Program da lavur e termins**

a) Il program provisoric vegn aunc inagada surluvraus dalla nova suprstonza. En cass ch'enzatgi vesa che termins collideschan cun tals indicai sin la gliesta duei el s'annunziar. Las midadas san vegnir rissguardadas ed ils termins fix vegnan lu publicai el cudischet dalla sesiun da tennis 2017.

b) Erich Decurtins fa la damonda da surluvrar / reveder ils stauts.

Silvio Albin fa la proposta da publicar las statutas ed il carnet da duers silla pagina d'internet per che tuts hagian la pusseivladad dall'investa da tals.

Allas duas damondas vegn concediu.

### **12. Varia**

Carla Nay ed Ursin Lechmann remarcan ch'ei seigi buca stau sempel dad anflar suprastonts ils davos onns. La Tamara e l'Annette seigien sedeclaradas promptas da segidar cun comunicar gia dalla bial'entschatta enneu ch'ellas sappien muort lur auters engaschis denton buca esser presentas stediamein ad occurrenzas . Tonaton audan ins adina puspei ellas retschas dils commembers criticas concernent lur muncar allas seras dil club ni a turniers. Carla accentuescha ch'ella seigi trumpada da quellas tschontschas. Ursin accentuescha ch'ei seigi magari d'engraziar dublamein a talas persunas che seigidien cun in club senza trer a nez grondamein las purschidas ni structuradas da tal, damai ch'ellas seprofiteschien aschia il pli pauc dall'uniun.

#### sistem electronic da reservaziun

Ursin lai saver ch'el hagi buca giu gronds resuns concernent il sistem da reservaziuns ed arva la discussiun.

Tamara supplichescha ils commembers da nudar il num dil co-commember el sistem da reservaziun sch'ins dat ina partida ensemen. Sche quei vegn buca fatg noda il sistem il partenari sco hosp. Alla fin digl onn vegn tschentau quen per quellas partidas.

#### cumiaus ed engraziament

Tamara e Carla prendan cumiau dils consuprastonts partents cun in present ed engrazien ad els per lur engaschi dils davos onns. Arthur parta suenter in engaschi da dus onns sco president, Annette suenter 4 onns sco actura ed Ursin suenter 4 onns sco meinagiug.

Carla engrazia als trenaders partents Urs, Carmen e Ricarda e surdat ad els in pign present.

Annette engrazia all'Erna per siu grond engaschi per in bi maletg en ed entuorn la casa dil club. Medemamein engrazia ella als responsabels partents dil lotto per lur gronda lavur. Tuts treis survegnan in regal.

Il president surdat medemamein fluras alla Tamara ed alla Carla per la buna collaboraziun duront ses dus onns sco president dil club da tennis e giavischa bia plascher e satisfaziun era egl avegnir.

Sco finiziun dalla sera engrazia il president partent ina davosa gada per igl engaschi da tuts presents. El envida ils presents da star da buna cumpignia tier in pign puschegn offerius dil club.

pil protocol: Annette Decurtins  
avrel 2017